

Phomolo, Likamano, le Pholo



SABATHA MANTSIBOEA

Bakeng sa boithuto ba beke ena, bala: *Gen. 42:7–20, Matt.25:41–46, Gen. 42:21–24, Gen. 45:1–15, Luka 23:34, Gen. 50:15–21.*

Temana ea Khopolo: “‘Me joale, le se ke la tsieleha, la ithlonamela kahoba la na la rekisa ka ’na, ka tla koano, hobane Molimo o nthomile ka pele ho lōna hore ke tle ke le pholose’” (*Gen. 45:5*).

Monna o ne a qosoa ka tlhekefetso ea motabo. Mosali ka katleho o ne a ile a khona ho mo tseba hara batšoaruoa ba pelaello. Leha bopaki bo ile ba etsa hore molato oa hae o tlise lipotso-potso, mosali o ne a tiisitse hore “Johnny” o molato.

Eaba Johnny o ea chankaneng, moo a ileng a lula lilemo tse leshome le metso e mene bakeng molato oa hae. Ke ha liteko tsa DNA li paka hore ha a molato mosali eo “Joan,” a ileng a eelloa hore o ne a entse phoso.

O ne a batla ho kopana le Johnny ka mora hore a lokolloe. Monna eo, ea utloileng bohloko ha kaalo, o tla etsang ha a tobana fahleho litalimane le mosali ea mo senyelitseng bophelo ka lilemo tse ngata ha kalo?

O ne a le ka kamoreng, a mo emetse hore a tle. Eitse ha tliile, ’me ba teanya mahlo, Joan a leketlisa likeleli.

“Johnny a inamela fatše le ho nka letsoho la ka, eaba oa ncheba o re, ‘Kea u tšoarella.’ Ne ke sa kholoe. Monna enoa ke enoa eo ke ileng ka mo hloea ’me eo ke neng ke mo lakaletsa lefu fela. Empa joale, ke enoa, o bolella ’na, ea mo entseng hampe joalo, hore oa ntšoarella? Ke ka nako eo ke ileng ka qalella ho utloisisa seo mohau o leng sona. ’Me ke ka nako eo ke ileng ka ba le pholo le phomolo ea ’nete.’”

Bekeng ena re tla shebana le tšoarello le seo e ka se etsang bakeng sa lipelo tsa batho tse se nang phomolo.

**Bala thutoea beke ena ho lokisetsa Sabatha sa la 14 Phato.*

Ho Tobana le tse Fetileng

Qetellong lintho tsa isa tseleng e nepahetseng bakeng sa Josefa, haholo fela. Hase feela hore o tsoa chankaneng, empa o etsoa tonakholo ea Egepeta eohle ka mora ho toloka toro ea Faro (*Genese 41*). A nyala a ba le bana ba babeli (*Gen. 41:50–52*). Meliko ea Egepeta ea tlala, 'me tlala e boletsoeng e ne e se e qalile. 'Me ka letsatsi le leng, bana b'abo Josefa ba fihla Egepeta.

Bala kopano ea pele lipakeng tsa Josefa le bana b'abo ho Genese 42:7–20. Hobaneng morero o hlalosoa ha kale? Josefa o ne a leka ho etsa eng ka kopano ea pele?

Josefa o ne a na le matla 'me a ka be a iphetelitse ho banab'abo ntle le ho ipuelella. Empa, ho e-na le boiphetetso, Josefa o khathatsehile ka lelapa la habo hae. O khathatsehile ka ntate oa hae. Na e be o ntse a phela, kapa lelapa le mathateng lee le fetohile lelapa bosieong ba mopatriareka? E be ngoan'abo Benyamine o kae? Joalo ka thabo le nyakallo ea ntat'ae, Benyamine o ne a se a le boemong boo Josefa a neng a le ho bona. Na e be baholoane ba hae ba fetiselitse mōna oa bona o kotsi ho Benyamine? Josefa joale o monyetleng oa ho hlokomela batho bana ba tsietsing, 'me o fela a etsa joalo.

Ho itloaetsa ho ea ka metheo ea Bible likamanong tsa rōna ha ho bolele hore re lokela ho amohela ho etsoa hampe kapa ho hlekefetsoa. E mong le e mong oa rōna o bohlokoa mahlong a Molimo. Jesu o lefile molato ofe sefapanong bakeng sa rōna.

Hobaneng eena Jesu ka sebele a nka tlhekefetso kapa ho se tsotelle ba batho ba bang e le taba? Bala Mat 25:41–46.

Bohle re rekiloe ka mali a Jesu, 'me ka molao bohle re ba hae. Mang kapa mang ea hlekefetsang o hlasela thepa ea Jesu.

Tlhekefetso e ka ba ka motabo, maikutlong kapa 'meleng ha li ea lokela ho ba karolo ea kholo ea lelapa. Sena ha se taba fela ea lelapa e ka rarolloang ka hare. Sena se tla hloka thuso le bokena lipakeng bo hlahang kantle. Haeba uena kapa motho e mong oa lelapa a hlekefetsoa, ka kopo batla thuso bathong ba tšeptjoang ba nang le litsebo.

Ke metheo e fe ea Bible eo u hlokang ho e sebelisa boemong bofe kapa bofe bothata ba likamano tsa lelapa tseo u nang le tsona ha joale?

Ho Lokisa Lebala

Josefa o tšoaretse banab'abo. Ha re tsebe hantle hore na Josefa o ba tšoaretse neng, empa ho hlakile hore ke khale pele ba ka itlhabisa. Josefa mohlomong a ka be a sa atleha Egepeta ha e ne e ba ha a tšoarella, haholo-holo, khalefo le ho baba li ka be li mo jele moeeng le ho senya likamano tsa hae le Molimo.

Lithuto tse 'malo tse entsoeng ho mahlatsipa a likoluo a li bontšitse taba hore tšoarello ho mahlatsipa a likoluo a tse mpe haholo, tšoarello e bile ntlha ea bohlokoa pholong ea bona le ho khutlela maphelong a bona hang hape. Kantle ho tšoarello, re lula re le mahlatsipa. Tšoarello e sebetsa haholo ho rōna ho feta motho motho kapa batho ba re sitetsoeng.

Leha Josefa a tšoaretse banab'abo, ha a ikemisetse ho itumella ho nka moo likamano tsa lelapa a li siileng hona teng; ke hore sekoti sa seliba Dothane. O lokela ho bona hore na hona le phetoho na.

Josefa o utloella eng? Bala Genese 42:21–24. O ithuta eng ka banab'abo?

Puisano eohle e ne e ntse e tsoela pele ka thuso ea toloko, 'me bana b'abo Josefa ba ne ba sa lemohe hore o ne a ba utloa. Josefa o utloa boipolelo ba bana b'abo. Ba ne ba nahana hore ka ho tlosa Josefa, ba ne ba tla lokoloha litlalehong tsa hae ho ntat'a bona. Ba ne ba nahana hore ba ka se tlo mamella litoro tsa hae kapa ho mo shebella a ntse a ea holimo le tlase ka boemo ba hore ke naleli e pela khoeli. Ho e-na le ho fumana phomolo, e sa le ba tšoeroe ke letsoalo le molato ka lilemo tsena tsohle. Ketso ea bona e ne e ba isitse ho hlokeng phomolo le holofatsa tšabo ea bona ho Molimo. Josefa o ba utloela bohloko ka seo ba se utloang. Oa ba llela.

Josefa oa tseba hore tlala e sa tla nka lilengoana tse ling tse ngata, 'me o hatella hore ba tlise Benyamine mohla ba khutlang ho tla reka koro (*Gen. 42:20*). Hape o boloka Simeone e le motšoaruo (*Gen. 42:24*).

Ka mora ho bona hore Benyamine o ntse a phela, o hlophisa mokete oo ka oona a bontšang ho ea ka tšobotsi phatlalatsa ho Benyamine (*Gen. 43:34*) ho bona hore na mona oak hale o ntse o le teng na. Bana b'abo ha ba bontše matšoa a lefufa, empa Josefa o ne a tseba hore ba ka hlalefa ho le ho kae. Hantle ba se ba ile ba thetsa motse ohle (*Gen. 34:13*), 'me o fela a lemoha hore ba buile leshano ho ntate oa bona ka hore na o feletse kae (*Gen. 37:31–34*). Joale, o loha teko e 'ngoe e kholo. (*Sheba Genese 44*.)

Bala Genese 45:1–15. See se re bolella eng ka hore na Josefa o ile a ikutloa joang ka banab'abo le tšoarello eo a ba fileng eona? Ke lithuto life tseo re lokelang ho inkela tsona paleng ee bakeng sa rōna?

Tšoarella le ho Leballa?

Tšoarello e hlalosoa e le boikemisetso ba ho lahla tokelo ea hao ea khalefo, kotlo, le boiphetetso malebana le ea o fositseng kapa sehlopha se sa sebetsang ka toka. Dr. Marilyn Armour, mohlabolli oa tsa malapa ea neng a sebetsa mahlatsipa a Holocaust e le ho fumana hore mahlatsipa a na a entse eng ho utloisisa se etsahetseng ho bona, oa ngola: “Taba ena eohle ea tšoarello ke ketso e etsoang ka morero ke lehlatsipa. Ha se ntho e iketsahallang fela tjena.”

Tšoarello ha e bolele hore ha ho na ba le litla morao. Tšoarello ha e bolele hore u tlohelle mohlekefetsi a tsoele pele ka mekhoha ea hae ea tlhekefetso. Tšoarello e bolela, hore re beha khalefo le takatso ea ho iphetetsa ho Molimo. Ha ho se joalo, khalefo, ho baba, bohloko, le lehloeo li ka re etsa ho feta seo motho kapa batho ba re entseng sona.

Ho tšparela ba bang ho re etsetsa eng? Sheba Mattheu 18:21–35.

Ha tika-tiko, se seng sa linotlo tsa ho ithuta ho tšoarella ke ho utloisisa seo se re tšoaretsoeng ho Krete. Bohle re sitiloe, e seng khahlanong le batho bang, empa khahlanong le Molimo hape.

Sebe se seng le se seng, ke sebe khahlanong le Morena oa rōna le 'mopi; empa ho Jesu, re ka batla tšoarello ka ho phethaha bakeng sa libe tseo tsohle, e seng hobane e re lokela—ha e re lokele—empa ka lebaka fela la mohau oa Molimo bakeng sa rōna. Hang ha re ka utloisisa 'nete e halalelang eo, hang ha re ka etsa tšoarello eo ea rōna, hang ha re ka ba le maiphihlelo a bo-'nete ba tšoarello ea Molimo, re ka qalella ho lesela le ho tšoarella ba bang. Re tšoarella e se hobane ba bang e ba lokela empa hobane e le seo re se amohetseng ho tsoa ho Molimo 'me re se hloka le rōna. Ntle le moo, ke ha kae re lokeloang ke tšoarello le rōna?

Joalo kaha re bone, hape, Josefa o fane ka monyetla oa bobeli bakeng sa likamano tsa lelapa. Ha ho makukuno mona; ha ho khitleloe morao linthong tse etsahetseng khale.

Ho thata haholo ho qala hape lelapeng leo motho e mong le e mong e le setsibi ho ithuteng ho utloisa ba bang bohloko ka ho fetisisa. Empa ha se ka tsela eo Josefa a etsang kateng. Ho bonahala hore o batla hore tsa khale e be li fetile le hore ba shebe pele ka lerato le kamohelano. Ho ja Josefa a bile le boitšoarō bo fapaneng, pale ena e ne e tla ba qetello e fapaneng, e seng monate ho hang.

“Ho lehlohonolo ba leseletsoeng makhopo a bona, bao libe tsa bona li apesitsoeng! Ho lehlohonolo monna eo Morena a sa 'malleng sebe sa hae” (Ba-Rom. 4:7, 8). **Paulose o re bolella eng ka seo re se filoeng ho Jesu le hore na tšepiso ena e hlolang e lokelang ho ama ka moo re amanang le ba bang kateng haholo ba re utloisitseng bohloko?**

Ho Etsa Lintho Boemong ba Botho

Hore ke tšoarele, ke lokela ho amohela hore ke utloisitsoe bohloko. Sena se ka ba thata ho etsoa, joalo ka ha ka linako tse ling re sekamela ho pateng boikutlo ba rōna ho e-na ho sebeletsa ho feta. Ho ananela boikutlo boo e seng ba Bokreste ba maikutlo a phahameng le khalefo pela Molimo ho nepahetse. Re bona sena hangata se hlaha Lipesalemeng. Nka koloha ho bolella Molimo hore ha ke rate se etsahetseng kapa kamoo ke ileng ka tšoaroa kateng le hore seo ha se nthabise kapa sea nkhalafisa kapa bobeli ba tsona.

Paleng ea Josefa, re 'mona a lla ha a bona bana b'abo hape le ho fokotsa boikutlo ba hae ba nako e fetileng.

Phatlalatso ea Jesu sefapanong e re bolella eng ka nako ea ho tšoarella? Bala Luka 23:34.

Jesu ha a ka a re emela hore re kope tšoarello pele. Ha rea lokela ho emela ea re entseng hampe ho tla kopa tšoarello. Re ka tšoarella ba bang ntle le hore bona ba amohela tšoarello ea rōna.

Luka 6:28 le Mattheu 5:44 li re ruta eng ka ho amana le ba utloisang bohloko kapa ba re etsang hampe?

Tšoarello, joalo ka lerato, e qala ka khetho e seng hore na u ikutloa joang. Re ka etsa khetho ea ho tšoarella, leha maikutlo a rōna a sa lumellane le qeto eo. Molimo oa tseba hore ka matla a rōna qeto eo ha e khonehe, empa “Molimo tsohle o ka li etsa” (*Mareka 10:27*). Ke ka hoo re bolellong hore re rapelle bao ba re etsang hampe. Maamong a mang, motho e ka 'na ea ba o se a hlokaetse, empa re ntse re ka rapella bokhoni ba hore re mo tšoarele.

Ha ho potang, tšoarello kamehla ha e bonolo. Bohloko le tšenyho eo re etselitsoeng e ka ba e kholo ruri, e sieang re lemetse, re khobetse, kapa re robehile. Pholo e tla tla, ha re e lumella, empa re ntse re tšoere khalefo le bohloko, ho tla etsa hore pholo e be thata, haeba le teng e ka ba teng.

Sefapano ke mohlala o motle ka ho fetisa oa se qositseng Molimo ka bo-eena ho re tšoarella. Ha e ba Morena a ka feta hara seo ka baka la rōna, leha a ne a tseba hore ba bangata leha ho le joalo, ba tla mo latola, ruri re ka ithuta ho tšoarella le rōna.

U hloka mang ho tšoarella—ha e se ka baka la motho eo, ke hobaneng e ke keng ea eba molemong oa hao?

Ho Fumana Phomolo ka Mor'a Tšoarelo

Lelapa la bo-Josefa qetellong le ile la fihla Egepeta. Ha ho sa na makunutu a siretseng joale. Banab'abo ba lokela e be ba ile ba amohela hore ba ile ba rekisa Josefa ha ba hlaosetsa ntate oa bona hore mora eo a neng a nahana hore o shoele joale ke tonakholo ea Egepeta.

Leha ho se bonolo kamehla kapa bohlahe ho tsosa likamano, sena ha se bolele hore re ka se tšoarele. Mohlomong re ka se khone ho aka le ho lla le ea re etsang hampe, empa mohlomong re ka hloka ho bua tšoarelo ea rōna ka molomo kapa lengolo. 'Me Joale ke nako ea ho tlohela bohloko ka moo re ka khonang kateng. Mohlomong bohloko bo bong bo tla sala kamehla, empa bonyane re ka ba tseleng e ntle ea pholo.

Bala Genese 50:15–21. **Bana b'abo Josefa ba khathatsehile ka eng, 'me ke hobaneng ba ka khathatseha? Tšabo ee e reng ka bona?**

Banab'abo Josefa ba ne ba phetse Egepeta ka lilemo tse leshome le metso e supileng (*Gen. 47:28*), empa ha Jakobo a shoa, ba ne ba tšaba hore Josefa joale o tla iphetetsa. Ba hlokomela hape hore na ke ha kae ba entseng Josefa hampe. Josefa o ba tiisetsa tšoarelo ea hae hape, joale ka mor'a lefu la ntat'a bona. Nchafatso ena mohlomong e ne e le ntle bakeng sa Josefa, 'moho le bana b'abo.

Ha leqeba le tebile, re tla lokela ho tšoarela makhetho a mangata. Ha mehopollo ea bobee bo o tla kelellong, re tla lokela ho ea ho Molimo hang-hang ka thapelo le ho etsa qeto ea tšoarela hape.

Bala Genese 50:20. **Temana ee e re thusa joang ho hlalosa, bonyane boikemisetsa ba Josefa ho tšoarela bana b'abo sebe sa bona khahlanong le bona?**

Josefa ka tieo o ne a lumela hore bophelo ba hae ke karolo ea morero oa Molimo o moholo ho pholosa ka nako eo-lefatše tlaleng, le ho thusa lelapa la habo ho phetha pallo ea Molimo ea ho ba sechaba se seholo. Ka ho tseba hore Molimo o fetisitse merero e mebe ea bana b'abo ho tlisa botle ho ile ha thusa Josefa ho tšoarela.

Pale ea Josefa e na qetello e monate. Ke joang re arabelang ha qetello ea pale e se monate? Kapa, na e mong a ka etsa khang hore (bakeng sa nako e telele) ka ho felisa sebe le pheletso ea toantšano e kholo, ha lintho tsohle li rarolotsoe—ke hona e tla ba qetello e monate? Ke joang tšepo ee e ka re thusang ho sebetsana le liqetello tse monate empa e se tsa mo shoelella?

Ho Ithuta Haholoanyane: “Joalo kaha Josefa a ile a rekisetsoa bahetene ke bana b’abo, Kreste o ile a rekisetsoa lira tsa hae tse kholo ke e mong oa barutuo ba hae. Josefa o ile a etseletsoa le ho akheloa teronkong ka baka la semelo sa hae; Kreste o ile a nyelisoa le ho latoloa ka baka la ho loka hae, bophelo ba boitumo e bile khalemelo sebeng; ’me leha a ne a le molato oa ntho eo a sa e etsang, o ile a ahloloa ka melomo ea lipaki tsa bohata. ’Me mamello ea Josefa le bonolo tlasa ho hloka toka le khatello, ho ikemisetsa ho tšoarella le mosa oa hae melebana le bao e neng e se bana b’abo ka tlhaho, ho emela mopholosi ka mamello ea hae e neng e se na likomang lehloeong le tlikefetsong ea batho ba khopo, le tšoarella ea hae, e seng fela ho ba bolai ba hae, empa ho bohle ba tlleng ho eena ba ipolela libe le ho kopa tšoarel.”—Ellen G. White, *Patriarchs and Prophets*, pp. 239, 240.

“Ha ho letho le ka utloahalang ka moea o sa tšoareleng. Ea se nang mohau malebana le ba bang o bontša eena ka bo-eena ha nke karolo mohaung oa Molimo oa tšoarel. Tšoareleng ea Molimo pelo ea ea fosang e huleloa haufi le pelo e kholo ea lerato le se nang tekanyo. Leqhubu la leholimo la kutloelo-bohloko le phallela moeeng oa moetsalibe, ’me ho tsoa ho eena le ho ea meeeng ea ba bang. Pelo-nolo le mohau tseo Kreste a li senotseng bophelong ba hae bo khabane li tla bonoa ho bao ba arolelanang ka mohau oa hae.”—Ellen G. White, *Christ’s Object Thutos*, p. 251.

Lipotso tsa Puisano:

- ❶ **Motho e mong o kile a re, “Ho se tšoarele ho joalo ka ho noa chefo ka ho nahana hore ho tla shoa motho e mong.” Polelo ee e bolela eng?**
- ❷ **Sepheo sa tlhaloso e kalo ea merero eo Josefa a e entseng e ne e le sefe pele a ka itsebisa? Se se ile sa mo etsa eng le bana b’abo?**
- ❸ **Mohlalobi oa ntlo ea Josefa o lokela e be o ne a keneletse ho e meng ea merero malebana le bana b’abo (e.g., Gen. 44:1–12). Ke joang maiphihlelo a tšoarel a amang ba shebeletseng?**
- ❹ **“Molimo ha a etelle bana ba hae pele ntle le hore ba khethe hore ba etelloe pele, ha e ba baka khona ho bona qetello e sa le qalong, le ho bona khanya ea sepheo seo ba se phethang e le basebetsi ’moho le eena.”—Ellen G. White, *The Desire of Ages*, pp. 224, 225. Nahana ka bophelo ba hao ha u ntse u thuisa polelo ena. Ke joang ho utloisisa see ho ka re thusang ho feta liteko tse ngata le mathata ao re tobanang le oona?**